

Schnitzelbanken 2015 **Gruppe 1 / Alibaba**

1. Im Chinderchor z`Kaltbrunn - cha Jedä gseh  
Do hätts gar kei Buebe - im Chörli meh,  
Dä Winiger hätt di wohl - alli vertriebä,  
mit sinä - himmlische – **Choresrytmä**  
**Halli, Hallo, Halli, Hallo.....**
2. D`Sportschützä vo Kaltbrunn - en **sozialä** Verein  
Di Ladet zum Schüssä - Behinderti ein,  
Di schüset ganz guet i allne Lage,  
Tüend Dachrinnä und Ziegel - **gar grüsli plagä**
3. D`Jumo im Dorf - es isch ä Schand  
Di Leiter sind z`fuhr - sisch Allerhand  
Papier sammle bringt Gäld - das isch Dänä glich,  
Drum chunt - bald s`Jugendteam - **vo Bänkä z`Hilf**
4. Für d`Gwerbeschau - di tolli Sach,  
Händs a der Uznacherstrooss - ä Taflä gmacht,  
D`Bewilligung hät gfählt - das isch doch zum Lachä,  
Mer hätt müssä über d`Schriftä - **wissi Tücher machä**
5. Cäbelcom – Swisscom - Fernsehschüsslä  
Jetzt wot au`s EW - do no mitmischlä,  
Es Glasfaserkabel - zä mol besser und gschwinder,  
Gnau s`Richtig - für üsi - **Computer Chinder,**
6. Wotsch im Hirschä ichere - nimm d`Wanderschuh mit,  
Vom Parkplatz bis zur Beiz - isch zweh Kilometer wit,  
Bi der Bruggmüllli - ganz amtlich - in klarer Schrift  
für dä Hirschä - a der Dorfstroos - **ä Parktaflä git**
7. Dä Miggel im Hirschä kännt Jedä im Dorf,  
Am Oktoberfäscht s`ihn - uf der Hinderchopf schloht,  
Am Johrmärt vor em Hirsche - breichts der Vorderchopf au,  
Er gwünnt bi der Tombola - **ä Apothek - di armi Sau**
8. Muesch wieder emol dini Liebi zeige  
Muesch em Valentinstag - id Chilä cheibe  
Äs Herzli wird gmolet - und es Sprüchli derzu  
Dänn häscht für es Jahr - **wieder dini Ruh**
9. Uf em Radweg nach Uznach - isch Allerhand los  
Do fahret zwei Velofahrer - ufenand los,  
Der Eint will überholä - der Ander schwänkt us,  
so landet sie Beidi - **im Chrankehuus**
10. Zwei Ärtzt in Kaltbrunn – das isch gar nüd zviel  
Chunt ganz drufa - was der Patient will,  
Bim Hugo dörsch Di abzieh - und er luegt dich guet a,  
Bim Jürgen chasch dank PC - **d`Hosä dobä laa**

Ihr händ jetzä ghört - dass viel isch passiert  
mir hoffet ihr händ - fascht alles kappiert  
bi eu chömmer jetzt - mit de Kassä verbi  
tüend bitte – en grosse Batze dri  
**Halli, Hallo, Halli, Hallo.....**